

**Isu arak, judi: Umno cuba kelirukan rakyat kata PAS**  
**Malaysiakini.com**  
**March 3, 2011**

Isu arak dan judi yang didakwa masih tidak diharamkan sepenuhnya di Kelantan menjadi perdebatan hangat antara seorang exco kerajaan dan ketua pembangkang pada persidangan Dewan Undangan Negeri (DUN) Kelantan.

Pengerusi Jawatankuasa Kerajaan Tempatan, Pelancongan dan Kebudayaan Negeri, Datuk Takiyuddin Hassan membidas ketua pembangkang, Datuk Md Alwi Che Ahmad (BN-Kok Lanas) yang membuat kenyataan yang mengelirukan rakyat semalam dan disiarkan di akhbar hari ini.

"Ketua pembangkang telah bercakap di luar dewan dalam kapasiti jawatannya itu dan menjadi persoalan kenapa tidak dibangkitkan di dalam dewan ini.

"Beliau (Md Alwi) cuba mengelirukan rakyat dengan membuat kenyataan yang tidak benar mengenai isu arak dan judi ini," katanya yang sebelum itu menjawab soalan Rohani Ibrahim (Pas-Tanjong Mas) di dewan itu.

Sambil menafikan dakwaan itu, Md Alwi berkata, sebagai ketua pembangkang, beliau hanya menjawab soalan wartawan yang menunggunya di luar.

Katanya, memang benar Islam telah mengharamkan arak dan judi, tetapi kerajaan Kelantan masih membenarkannya kepada penganut bukan Islam bagi menghormati budaya mereka.

"Haram tetap haram dan halal tetap halal, tetapi dakwaan yang mengatakan Umno membenarkan perkara ini juga tidak benar dan saya boleh menerima keadaan ini di Kelantan," katanya.

- Bernama